



Sana'a al-Adly-Vejzagić

Sana'a al-Adly Vejzagić (Aleksandrija, 1946) bila je lektor za arapski jezik. Na Fakultetu islamskih nauka bila je angažirana od 1979. do 2011. godine, kada je penzionirana. Fakultetsku diplomu stekla je na Univerzitetu El-Azhar. Osim na Fakultetu, držala je predavanja iz arapskog jezika i u Gazi Husrev-begovoj medresi. Za potrebe izvođenja lektorskih vježbi napisala je udžbenik *Arapski jezik: konverzacija*. Objavila je nekoliko tekstova u *Zborniku radova FIN-a*. Prva je žena predavač na Fakultetu islamskih nauka.



Omer Nakičević

Omer Nakičević (Teočak, 1927) je profesor emeritus na Katedri za hadis (poslaničku tradiciju). Na Fakultetu islamskih nauka radi od 1982. god. Svršenik je Filozofskog fakulteta u Beogradu. Magistarski rad pod naslovom *Šejh Hasan Kafi Pruščak – pionir arapsko islamskih znanosti u BiH* odbranio je na Fakultetu za književnost Kairskog univerziteta 1968. Doktorsku disertaciju pod naslovom *Arapsko-islamske znanosti u BiH i glavne škole od XV do XVII vijeka (Sarajevo, Mostar, Prusac)* odbranio je na Filološkom fakultetu u Beogradu 1981. god. Bio je prevodilac i spiker programa na arapskom jeziku Radio-televizije Beograd. Radio je kao profesor arapskog jezika u Gazi Husrev-begovoj medresi. Obnašao je funkciju šefa za zaštitu, obradu i istraživanje arhivske građe i rukopisa na orijentalnim jezicima Sekcija pri Pokrajinskom arhivu u Prištini a bio je angažiran i na obradi rukopisa na orijentalnim jezicima pri Gazi Husrev-begovoj biblioteci. Bio je dekan Fakulteta od 1987. do 1990. te od 1993. do 2000. god. Dobitnik

je nekoliko priznanja i nagrada. Od njegovih djela izdvajamo: *Arapsko-islamske znanosti i glavne škole od XV do XVII vijeka (Sarajevo, Mostar, Prusac)* (1981), *Uvod u hadiske znanosti* (1986), *Historijski razvoj institucije Rijaset* (1996), *Historijski razvoj Fakulteta islamskih nauka (1887-1998)* (1998), *Kur'anski belagat i njegov 'idžaz – nadnaravnost Kur'ana* (2000), *Hafiz Seid Zenunović i njegov prijevod Kur'ana* (2002), *Teočak kroz protok vremena* (2010), *Muhamed Pašić, zaboravljeni direktor Šerijatske gimnazije* (2011), *Hafiz Omer Mušić, profesor (1903-1972)*, (2012), *U vrtlogu vremena (1927-2017)*. Prevodilac je značajnih djela s arapskog jezika.




Hilmo Neimarlija

Hilmo Neimarlija (Ričica kod Kaknja, 1950) radio je kao docent na Katedri za islamsku filozofiju na Fakultetu islamskih nauka u Sarajevu od 1977. do 1992. te od 2002. do 2015. Od 2002. do 2011. bio je angažiran kao vanjski saradnik. Svršenik je Fakulteta političkih nauka u Sarajevu. Magistarski rad pod naslovom *Protivurječnosti u Špenglerovoj filozofiji povijesti* odbranio je na Filozofskom fakultetu u Sarajevu 1985. Doktorsku disertaciju pod naslovom *Morfologija svjetske povijesti Osvalda Špenglera* odbranio je na istom fakultetu 2002. godine. Uređivao je *Takvim* i izdanja Udruženja ilmijje. Obavljao je dužnost glavnog i odgovornog urednika Izdavačke djelatnosti Islamske zajednice u BiH. Bio je urednik *Preporoda*. U dva mandata je bio poslanik u Predstavničkom domu Parlamentarne Skupštine BiH, te dva mandata delegat u Domu naroda Parlamentarne Skupštine BiH. Dva puta je biran za predsjednika Sabora Islamske zajednice u BiH. Koautor je nacрта važećeg Ustava Islamske zajednice u BiH. Bio je član Inicijativnog odbora i Glavnog odbora Kulturnog društva *Preporod* te Izvršnog odbora Stranke demokratske akcije, predsjednik Fondacije *Popis 2013* i predsjednik Upravnog odbora Fakulteta islamskih nauka te Upravnog odbora Vijeća Kongresa bošnjačkih intelektualaca.



Ismet Bušatlić

Ismet Bušatlić (Zastinje kod D. Vakufa, 1948) vanredni profesor u mirovini. Bio je vanredni profesor na Katedri za islamsku civilizaciju u periodu 1997-2015. Obavljao je dužnost prodekana za nastavu (2001-2005) i dekana (2007-2015). Diplomirao je na Islamskom teološkom fakultetu u Sarajevu. Magistrirao je i doktorirao na Filološkom fakultetu Univerziteta *Complutense* u Madridu 2000. disertacijom pod naslovom *Andaluzijska djela poznata u Bosni i njihov utjecaj na vjerski i intelektualni život (Obras andalusies conocidas en Bosnia e influyentes en su desarrollo religioso e intelectual)*. Autor je dvije monografije: *Studije o sljedbenicima knjige* (2009) te *Kraljevski grad pod sultanima: Jajce 1528-1878* (2011). Prije dolaska na Fakultet islamskih nauka radio je kao imam i vjerskoprosvjetni referent u Trebinju, kao kustos Muzejske zbirke u Gazi Husrev-begovoj biblioteci te kao glavni i odgovorni urednik *Islamske misli* i časopisa *Elif* u Podgorici. Član je redakcije časopisa *Anali Gazi Husrev-begove biblioteke*, *Novi muallim*, *Al-Hikma* te časopisa *Godišnjak BKZ Preporod*.



Murat Dizdarević

Murat Dizdarević (Bistrica kod Bijelog Polja, 1943) bio je vanredni profesor na predmetu Engleski jezik. Na Fakultetu islamskih nauka u Sarajevu radio je od 1999. do 2013. godine. Svršenik je Filozofskog fakulteta u Prištini. Magistarski rad pod naslovom *Fosterova romaneskna teorija i praksa* odbranio je na Filozofskom fakultetu Sveučilišta u Zagrebu 1980. Doktorsku disertaciju pod naslovom *Engleski roman 18. i 19. vijeka u kritici na srpskohrvatskom jeziku* odbranio je na Filološkom fakultetu u Prištini 1990. Predavao je Engleski jezik na Univerzitetu u Prištini i Univerzitetu u Sarajevu. Bio je prodekan za nastavno-naučni rad na Saobraćajnom fakultetu Univerziteta u Sarajevu i član Suda časti Univerziteta u Sarajevu. Od 1994. do 1999. bio je u diplomatskoj službi Bosne i Hercegovine, od čega četiri godine kao savjetnik u Ambasadi BiH u Londonu. Objavio je više naučnih i stručnih radova iz oblasti anglistike i književne historije. Bavi se i prevodjenjem.



Azra Saračević

Azra Saračević (Bihać, 1936) bila je predavač na predmetu Engleski jezik. Na Fakultetu islamskih nauka radila je od 1984. do 2009. Od 2000. godine, kada je umirovljena, bila honorarno angažirana. Završila je studij engleskog i francuskog jezika na Filozofskom fakultetu Univerziteta u Sarajevu. Bavila se prevodilačkom djelatnošću, usmenom i pismenom.



Nusret Isanović

Nusret Isanović (Gradačac, 1954) radio je kao redovni profesor na Katedri za islamsku filozofiju na Fakultetu islamskih nauka u Sarajevu od 2017. do 2022. Od 1993. do 2017. bio je angažovan kao univerzitetski nastavnik na Islamskom pedagoškom fakultetu Univerziteta u Zenici (Islamska pedagoška akademija). U periodu od 1993. do 2002. godine bio je dekan Islamske pedagoške akademije u Zenici. Godine 1979. diplomirao je filozofiju i sociologiju na Filozofskom fakultetu u Sarajevu. Na istom fakultetu odbranio je magistarski rad pod naslovom *Metafizičke i kulturno-civilizacijske pretpostavke islamske umjetnosti* 2000. god. Doktorsku disertaciju u oblasti islamske filozofije pod naslovom *Osobenost islamske umjetnosti i njen izraz u arhitekturi i kaligrafiji* odbranio je na Fakultetu islamskih nauka 2006. god. Dr. Nusret Isanović bio je urednik Islamskih informativnih novina *Preporod*, Časopisa *Islamska misao*, Izdavačkog centra Rijasetu IZ-e u BiH - *El-Kalem*, Zbornika radova Islamskog pedagoškog fakulteta u Zenici, Zbornika radova Fakulteta islamskih nauka u Sarajevu. Objavio je više djela, te naučnih i stručnih radova iz oblasti filozofije, islamske umjetnosti i teorije odgoja i obrazovanja.